

Litteratura 35 cun auturas ed auturs sut 35

■ (anr/fa) La revista Litteratura actuala ha dà a sis personas la pussaivladad da scriver in text e quai accompagna da dad in mentur u ina mentura. L'unica cundiziun era che la persona haja main che 35 onns. Cun la revista Litteratura han atgnamain tut las auturas e tut ils auturs la pussaivladad da scriver e publicitar lur texts litterars. «Cun la Litteratura 35 vuleva l'Uniun per la Litteratura Rumantscha dentant dar la pussaivladad explicitamain ad auturas ed auturs giuvens da lavurar a moda intensiva cun lur texts», han declerà dumengia *Uorschla Natalia Caprez Brülhart* e *Silvana Derungs* a chaschun da la preschentaziun da la nova Litteratura. Ellas, che han procurà ensemen la redacziun da la Litteratura 35, han explitgà tge che quai signifitgava en quest cas «lavurar a moda intensiva cun in text».

Dond l'ocasiun da survegnir resuns als texts

L'atun passà han las duas redacturas scrit ad ina tshuncantina da pussaivlas auturas ed auturs giuvens. «Nus als avain envidas da scriver cun als dar la pussaivladad dad esser accompagnads dad ina mentura u in mentur.» Ina brev sumeglianta han ellas scrit er ad ina trentina da personas, menturs e menturas poten-



Las redacturas *Silvana Derungs* e *Uorschla Natalia Caprez Brülhart* cun la nova Litteratura.

FOTOS F. ANDRY

zialas, per las dumandar sch'ellas stessan a disposiziun per questa sort da «tandem litterar». I s'han annunziadas sis auturas: *Carin Caduff* è vegnida accompagna da la mentura *Eva Riedi*, *Dominique Dosch* da la mentura *Annetta Ganzoni*, *Flavia Hobi* ha gè sco mentur a *Rico F. Valär*, *Fadrina Hofmann* la mentura *Romana Ganzoni*, *Annatina Nay* ha gè sco mentura *Rita Cathomas-Bearth* e *Natalia Salzgeber* la mentura *Sidonia*

Klainguti. Las lecturas ed ils lecturs da la Litteratura 35 nun han mo la pussaivladad da leger ils texts, els pon era persequitar la genesa da quels naschids en ils tandems tranter auturas e menturs. La Litteratura 35 cuntegna ultra da recensius, intervistas e necrologs enpli er in'installaziun cun spazis da *Selina Puorger*, quatter texts da *Linguissimo 2016* e trais da la *Concurrenza per fabuluns e poetins*.



Ils tshintg che èn sa qualifitgads per il Premi Term Bel: *Gion Dominic Pohle*, *Stina Hendry*, *Rut Bernardi*, *Romana Ganzoni* ed *Alice Bertogg*.